

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma, održanoj 27. jula 2004. godine, i sjednici Doma naroda, održanoj 9. septembra 2004. godine, usvojila je

## **ZAKON O TEHNIČKIM ZAHTJEVIMA ZA PROIZVODE I OCJENJIVANJU USKLAĐENOSTI**

### **I - OPĆE ODREDBE**

#### **Član 1.**

1. Ovim zakonom uređuje se način propisivanja tehničkih zahtjeva za proizvode i postupaka ocjenjivanja usklađenosti s propisanim zahtjevima, te donošenje tehničkih propisa kojima nadležni organi, na osnovu ovog zakona, za pojedine proizvode, odnosno grupe proizvoda, detaljnije uređuju najmanje jedan od sljedećih elemenata:
  - tehničke zahtjeve koje moraju ispuniti proizvodi koji se stavljaju na tržište i/ili u upotrebu,
  - prava i obaveze pravnih i fizičkih osoba koje stavljaju proizvode na tržište i/ili u upotrebu,
  - postupke ocjenjivanja usklađenosti proizvoda s propisanim zahtjevima,
  - prava i obaveze tijela koja provode postupke ocjenjivanja usklađenosti proizvoda s tehničkim zahtjevima (u daljem tekstu: tijela za ocjenjivanje usklađenosti),
  - dokumente (npr. potvrde, tehničku dokumentaciju i slično) koji moraju biti dostupni nadležnim organima/tijelima prije stavljanja proizvoda na tržište i/ili u upotrebu,
  - način označavanja proizvoda.
2. Ovim zakonom uređuje se i priznavanje dokumenata o usklađenosti i znakova usklađenosti izdatih u inozemstvu.
3. Ovaj zakon ne primjenjuje se na propisivanje tehničkih zahtjeva i provođenje postupaka ocjenjivanja usklađenosti za proizvode za koje je to uređeno posebnim zakonima.

#### **Član 2.**

U cilju usklađivanja tehničkih propisa u Bosni i Hercegovini s direktivama Evropske unije, Ministarstvo vanjske trgovine i ekonomskih odnosa BiH donijet će tehničke propise.

#### **Član 3.**

Proizvodi se mogu staviti na tržište ili u upotrebu samo ukoliko ispunjavaju tehničke zahtjeve koji se na njih odnose, ako je njihova usklađenost s tehničkim zahtjevima utvrđena propisanim postupcima ocjenjivanja usklađenosti, te ukoliko nose znak usklađenosti u skladu s tehničkim zahtjevima.

#### **Član 4.**

U smislu odredbi ovog zakona, upotrebljavat će se sljedeće definicije:

**Proizvod** je svaki predmet na koji se odnosi jedan ili više tehničkih zahtjeva iz člana 5., koji je namijenjen za stavljanje na tržište ili u upotrebu u Bosni i Hercegovini prvi put, kao na primjer: oprema, aparati, sredstva, uređaji, instrumenti, materijali, sklopovi, komponente ili sigurnosne komponente, jedinice, mehanizmi, pribor, sistemi i drugo.

**Proizvođač** je svaka pravna ili fizička osoba koja je odgovorna za dizajn i proizvodnju nekog proizvoda koji namjerava staviti na tržište ili u upotrebu pod svojim imenom. Također, osoba koja mijenja, temeljito modificira ili prerađuje proizvod, čime se mijenja funkcija ili primjena proizvoda smatra se proizvođačem po ovom zakonu.

**Stavljanje proizvoda na tržište** je prva radnja kojom se proizvod stavlja na raspolaganje, uz naplatu ili besplatno, prvi put na tržište Bosne i Hercegovine, s namjerom

distribuiranja ili upotrebe na tržištu Bosne i Hercegovine. Ova definicija ne uključuje proizvode koji su proizvedeni ili uvezeni s namjerom da se prodaju na stranom tržištu.

**Stavljanje proizvoda u upotrebu** je trenutak prve upotrebe proizvoda u Bosni i Hercegovini od strane krajnjeg korisnika.

**Nadzor nad tržištem** je niz propisanih metoda, postupaka i radnji koje preduzimaju nadležni organi kako bi se osiguralo da proizvodi na tržištu zadovoljavaju tehničke i druge zahtjeve koji se na njih odnose, da imaju potrebne oznake usklađenosti te da su praćeni potrebnom tehničkom dokumentacijom.

**Harmonizirani evropski standard** je tehnička specifikacija koju je usvojila neka od evropskih organizacija za standardizaciju (CEN), Evropski komitet za elektrotehničke standarde (CENELEC) ili Evropski telekomunikacioni institut za standarde (ETSI), razrađena u okviru mandata datog od strane Evropske komisije, a služi kao podrška ispunjavanju osnovnih zahtjeva propisanih direktivama novog pristupa.

**Akreditiranje** je postupak kojim nadležni organ dodjelom akreditacije službeno priznaje da je neki organ ili osoba sposobna za obavljanje određenih poslova, odnosno zadataka u području ocjenjivanja usklađenosti.

**Tijelo za ocjenjivanje usklađenosti** je tijelo koje provodi postupak ocjenjivanja usklađenosti, nezavisno je od dobavljača a može biti certifikaciono tijelo, laboratorij, inspeksijsko (kontrolno) ili drugo tijelo.

**Imenovano tijelo za ocjenjivanje usklađenosti** je tijelo za ocjenjivanje usklađenosti imenovano od strane Ministarstva vanjske trgovine i ekonomskih odnosa BiH. Imenovati se mogu certifikaciona tijela i inspeksijska (kontrolna) tijela.

**Tehnički propis** je propis u kojem se tehnički zahtjevi uređuju direktno ili upućivanjem na standard, tehničku specifikaciju, uputstva za primjenu ili kodeks praksi ili pak uključivanjem sadržaja tih dokumenata.

**Direktive novog pristupa** su propisi EU kojim se za pojedine proizvode ili grupe proizvoda uređuju samo osnovni zahtjevi u oblastima navedenim u članu 5. ovog zakona.

## II - PROPISIVANJE TEHNIČKIH ZAHTJEVA

### Član 5.

Tehničkim propisima iz člana 2. odredit će se obaveze pravnih i fizičkih osoba koje stavljaju proizvode na tržište i/ili u upotrebu u pogledu zahtjeva za sigurnost proizvoda, zaštitu zdravlja ljudi i domaćih životinja, te zaštitu okoline i drugo što je potrebno za uređivanje područja na koje se tehnički propis odnosi.

### Član 6.

1. Tehničke propise koji se odnose na ovaj zakon donosi Ministarstvo vanjske trgovine i ekonomskih odnosa BiH, na osnovu prijedloga Komiteta za tehničke propise BiH.
2. Komitet za tehničke propise BiH sastoji se od sljedećih stalnih članova: ministra vanjske trgovine i ekonomskih odnosa BiH, ministra privrede, energetike i razvoja Republike Srpske ministra energije, rudarstva i industrije Federacije BiH, šefa Odjela za urbanizam, imovinske odnose i privredni razvoj Brčko Distrikta Bosne i Hercegovine i direktora Direkcije za evropske integracije. Komitet za tehničke propise BiH donijet će poslovnik o radu.
3. Nadležna entitetska ministarstva i Odjel za urbanizam, imovinske odnose i privredni razvoj Brčko Distrikta Bosne i Hercegovine učestvovat će u pripremi i implementaciji tehničkih propisa.
4. Vijeće ministara BiH će, na prijedlog ministra vanjske trgovine i ekonomskih odnosa BiH, uz suglasnost Komiteta za tehničke propise BiH, donijeti program preuzimanja tehničkih propisa iz člana 2. i uputstvo o načinu izrade i postupku donošenja tehničkih propisa.

5. Kod izrade i donošenja tehničkih propisa iz stava 1. ovog člana, a radi sprečavanja nepotrebnih zapreka u vanjskoj trgovini, uzimat će se u obzir međunarodni principi i obaveze iz bilateralnih i multilateralnih sporazuma koje je preuzela BiH.
6. Komitet za tehničke propise BiH može imenovati kompetentne eksperte za pripremu pojedinih tehničkih propisa.

#### Član 7.

1. Za proizvode koji su usklađeni s bosanskohercegovačkim standardima putem kojih su usvojeni evropski harmonizirani standardi, pretpostavlja se da su usklađeni s osnovnim zahtjevima navedenim u tehničkim propisima.
2. Spisak bosanskohercegovačkih standarda na koje se poziva u stavu 1. ovog člana bit će utvrđen u skladu s procedurom opisanom u članu 6. stav 1. i objavljen u "Službenom glasniku BiH".

#### Član 8.

Ako se nakon konsultacija s Institutom za standardizaciju BiH i Komitetom za tehničke propise BiH utvrdi da proizvod koji ispunjava zahtjeve bosansko hercegovačkih standarda ne ispunjava zahtjeve sadržane u posebnim tehničkim propisima, ili da bi se tim proizvodom mogla ugroziti sigurnost korisnika, zdravlje ljudi i domaćih životinja, te životna okolina, Ministarstvo vanjske trgovine i ekonomskih odnosa BiH donijet će odluku o djelimičnom ili potpunom brisanju osporenog bosanskohercegovačkog standarda sa spiska na koji se poziva u članu 7. Ova odluka objavit će se u "Službenom glasniku BiH".

### III - POSTUPCI OCJENJIVANJA USKLAĐENOSTI

#### Član 9.

1. Prije stavljanja proizvoda na tržište ili u upotrebu, proizvođač, njegov ovlašten predstavnik u Bosni i Hercegovini ili osoba koja proizvod stavlja na tržište Bosne i Hercegovine mora ocijeniti njegovu usklađenost sa osnovnim zahtjevima važećih tehničkih propisa.
2. Postupci ocjenjivanja usklađenosti definirani su u tehničkim propisima.

#### Član 10.

1. Tehnički propisi iz člana 5. propisuju oblik, sadržaj i grafički simbol znaka usklađenosti koji se stavlja na proizvod koji ispunjava propisane tehničke zahtjeve i postupak ocjenjivanja usklađenosti.
2. Proizvodi za koje je to propisano moraju biti označeni znakom usklađenosti.
3. Na proizvode koji nisu usklađeni s propisanim tehničkim zahtjevima i proizvode za koje nije propisano označavanje znakom usklađenosti ne smije se stavljati znak usklađenosti ili drugi znak koji je sličan propisanom znaku usklađenosti i koji bi mogao stvoriti zabunu na tržištu ili obmanuti potrošača.

#### Član 11.

Ocjenjivanje usklađenosti provodit će se po jednom od sljedećih postupaka ili njihovom kombinacijom:

- proizvođačevo ocjenjivanje usklađenosti proizvoda,
- ocjenjivanje usklađenosti proizvoda koju obavlja tijelo za ocjenjivanje usklađenosti,
- proizvođačevo upravljanje sistemom osiguranja kvaliteta proizvodnog procesa,
- ocjenjivanje svrsishodnosti proizvođačevog sistema osiguranja kvaliteta proizvodnog procesa za konkretnu svrhu (proizvod) i nadzor nad tim sistemom, a koji provodi tijelo za ocjenjivanje usklađenosti.

## VI - TIJELA ZA OCJENJIVANJE USKLAĐENOSTI I ZAHTJEVI KOJE MORAJU ZADOVOLJITI

### Član 12.

1. Za provođenje postupaka ocjenjivanja usklađenosti iz člana 11., tehničkim propisima može se zahtijevati od proizvođača, njegovog ovlaštenog predstavnika u Bosni i Hercegovini ili osobe koja proizvod stavlja na tržište Bosne i Hercegovine da uključi imenovano tijelo za ocjenjivanje usklađenosti.
2. Tehničkim propisima detaljnije se uređuju kriteriji za imenovanje kao i zadaci i obaveze imenovanih tijela za ocjenjivanje usklađenosti u postupku ocjenjivanja usklađenosti proizvoda pokrivenih tehničkim propisima.
3. Tehničkim propisima utvrđuju se posebni kriteriji koje moraju ispuniti tijela za ocjenjivanje usklađenosti kako bi stekla status imenovanih tijela za ocjenjivanje usklađenosti.
4. Tijela za ocjenjivanje usklađenosti rješenjem imenuje ministar vanjske trgovine i ekonomskih odnosa BiH, u skladu s procedurom datom u članu 6., stav 1. Protiv ovog rješenja nije dozvoljena žalba, ali se može pokrenuti upravni spor.
5. Imenovanje tijela za ocjenu usklađenosti na koje se poziva u prethodnom stavu može biti vremenski ograničeno ili važiti do svog povlačenja.
6. Tehnička osposobljenost, nezavisnost i nepristrasnost imenovanih tijela za ocjenjivanje usklađenosti bit će ocjenjivana i nadzirana u skladu s pravilima akreditacije ili pravilima sličnima onima za akreditaciju koja odobri Komitet za tehničke propise BiH za pojedinačni slučaj.
7. Kada nadležni organi ustanove da imenovano tijelo za ocjenjivanje usklađenosti više ne ispunjava bilo koji od kriterija pomenut u stavu 2. ovog člana, njegovo imenovanje može se povući u skladu s procedurom opisanom u stavu 4. ovog člana.
8. Obavještenje o imenovanju tijela za ocjenjivanje usklađenosti, kao i o povlačenju imenovanja objavit će se u "Službenom glasniku BiH". Obavještenje će sadržavati naziv i adresu imenovanog tijela za ocjenjivanje usklađenosti, moguća vremenska ograničenja imenovanja i grupe proizvoda i postupaka ocjenjivanja usklađenosti za koje je imenovano tijelo za ocjenjivanje usklađenosti imenovano.
9. Evidenciju imenovanih tijela za ocjenjivanje usklađenosti vodi Ministarstvo vanjske trgovine i ekonomskih odnosa BiH. Evidencija je javna knjiga.

## V - PRIZNAVANJE DOKUMENATA I ZNAKOVA USKLAĐENOSTI IZDATIH U INOZEMSTVU

### Član 13.

1. U Bosni i Hercegovini priznaju se dokumenti o usklađenosti i oznake usklađenosti izdate u inozemstvu ako su sačinjeni na osnovu međunarodnih ugovora o međusobnom priznavanju dokumenata iz oblasti ocjenjivanja usklađenosti, koje je potpisala BiH.
2. Ministar vanjske trgovine i ekonomskih odnosa BiH, koji je donio tehnički propis, može podnosiocu zahtjeva priznati dokument o usklađenosti i znake usklađenosti izdate u državama s kojima BiH nije potpisala međunarodne ugovore iz prethodnog stava, ako su oni izdati prema tehničkim propisima koji su istovjetni s važećim bosanskohercegovačkim tehničkim propisima, i ako je osposobljenost tijela koja su učestvovala u postupku ocjenjivanja usklađenosti utvrđena prema istom postupku i zahtjevima koji su propisani za ta tijela u bosanskohercegovačkim tehničkim propisima. Vijeće ministara BiH će, na prijedlog ministra vanjske trgovine i ekonomskih odnosa BiH, donijeti poseban propis kojim će urediti uslove i način priznavanja dokumenata iz ovog stava.

3. Evidenciju priznatih dokumenata o usklađenosti i znakova usklađenosti te tijela za ocjenu usklađenosti iz stava 2. ovog člana vodi Ministarstvo vanjske trgovine i ekonomskih odnosa BiH. Evidencija je javna knjiga.

## VI - NADZOR

### Član 14.

Nadzor nad provođenjem ovog zakona vršit će Ministarstvo vanjske trgovine i ekonomskih odnosa BiH i entitetska ministarstva i Brčko Distrikta BiH nadležna za pojedine proizvode ili grupe proizvoda.

### Član 15.

Ako se utvrdi da proizvodi koji su usklađeni s tehničkim propisima, u slučaju da su ispravno instalirani, održavani i korišteni za svoju određenu svrhu, mogu ugroziti zdravlje i/ili sigurnost korisnika ili drugih osoba, nadležni organi moraju poduzeti sve potrebne mjere u cilju povlačenja takvih proizvoda s tržišta ili zabrane ili ograničavanja njihovog stavljanja na tržište ili stavljanja u upotrebu, i moraju odmah informirati javnost tako što će dati obavještenje u "Službenom glasniku BiH".

### Član 16.

Nadzor nad tržištem obavlja se u skladu s pravilima i postupcima uređenim posebnim zakonom.

## VII - KAZNENE ODREDBE

### Član 17.

1. Novčanom kaznom od 2.000 KM do 10.000 KM kaznit će se za prekršaj pravna osoba, odnosno novčanom kaznom od 1.000 KM do 5.000 KM fizička osoba koja samostalno obavlja djelatnosti ako:
  - a) stavi na tržište, odnosno stavi u upotrebu proizvod protivno članu 3. ovog zakona,
  - b) stavi na tržište, odnosno stavi u upotrebu proizvod protivno članu 5. ovog zakona,
  - c) ne označi proizvode koji su usklađeni s propisanim tehničkim zahtjevima znakom usklađenosti prema članu 10. stav 2. ovog zakona,
  - d) označi proizvode koji nisu usklađeni s propisanim tehničkim zahtjevima znakom usklađenosti ili drugim oznakama koje su slične oznakama usklađenosti do te mjere da bi mogle stvoriti zabunu na tržištu ili obmanuti potrošače prema članu 10. stav 3. ovog zakona,
  - e) ne obavlja poslove tijela za ocjenu usklađenosti saglasno članu 11. ovog zakona, f) obavlja poslove imenovanog tijela za ocjenjivanje usklađenosti bez dobivenog rješenja o imenovanju ili izvan predmeta i obima tog imenovanja, prema članu 12. stav 4. ovog zakona.
2. Novčanom kaznom od 500 KM do 2.000 KM kaznit će se za prekršaj i osoba pravne osobe za učinjeni prekršaj iz prethodnog stava.

## VIII - PRIJELAZNE ODREDBE

### Član 18.

1. Stupanjem na snagu ovog zakona prestaju važiti odredbe svih zakona Bosne i Hercegovine, entiteta i Brčko Distrikta Bosne i Hercegovine, koje su u suprotnosti s odredbama ovog zakona.
2. U roku od 90 dana od stupanja na snagu tehničkih propisa navedenih u članu 6., sve odredbe zakona, propisa, tehničkih propisa, standarda i svih drugih dokumenata koji se u entitetima primjenjuju na proizvode iz člana 5. ovog zakona, moraju se uskladiti s odredbama ovog zakona kao i s odredbama donesenih tehničkih propisa.

Član 19.

Vijeće ministara BiH će, na prijedlog ministra vanjske trgovine i ekonomskih odnosa BiH, donijeti program i uputstvo iz člana 6., stav 4., te poseban propis iz člana 13. stav 2. u roku od 60 dana od dana stupanja na snagu ovog zakona.

Član 20.

Komitet za tehničke propise BiH donijet će svoj poslovnik o radu naveden u članu 6., stav 2., u roku od 60 dana od dana stupanja na snagu ovog zakona.

Član 21.

Ovaj zakon stupa na snagu osmoga dana od dana objavljivanja u "Službenom glasniku BiH", a objavit će se u službenim glasilima entiteta i Brčko Distrikta Bosne i Hercegovine.

PS BiH broj 100/04  
9. septembra 2004. godine  
Sarajevo

Predsjedavajući  
Predstavničkog doma  
Parlamentarne skupštine BiH  
**Martin Raguž**, s. r.

Predsjedavajući  
Doma naroda  
Parlamentarne skupštine BiH  
**Goran Milojević**, s. r.